

Makitibi ki Pol ndangi adi Kolosi je

Ta ki do makitibi ti ki Pol ndangi adi Kolosi je

Kate mari nu, Kolosi e be bo kare ki dɔnangi Aji ti, ki a asi kulə mətər 200, kaw ki lo kibi kadi ti lə be ki Epəji ti be. Basine kin bari-e Turki ngata. Re ə nə o maji ba, a e be ki Pol ində njane ti nja kare al. E madi-kilə Pol kare ki tɔe nə Epapirasi, ki e dəw ki Kolosi ti wa nɔɔ ə e dəw ki dɔsɔy ki aw ki Poy Ta ki Maji me ti (Kol 1.7; 4.12).

Dəkagiloe ti kin Pol e dangay ti (4.3; 10, 18), dɔmaji ə a e Rom ti. Ə Epapirasi re rɔ Pol ti ɔr-e poy njé kaw-naa je ki Kolosi ti təkɪ nɛ ndo ki go rəbe ti al isi njiyə dande ti nɔɔ ki tɔgine ngay. Əl təkɪ njé ndo nɛe je ka kin əli kadi dəw gər Luwə ə ingə kaji ba, sɔbi kadi aw nɔ tɔgɪ je ti ki go ndil ti nim, kadi ilə dɔne gin nɛ jibəl be je ti madi tə kijə mɔti je, kində kəm go kuji kuso nɛ je ti ki kuji kɔy nɛ je ti. NGay al go poy ta ti kin ba, nje kaw kilə Pol ndangi makitibi adi njé kadi-me je ki Kolosi ti, ole mede təkɪ kaji ki Luwə adi-je ki takul Jəju Kirisi kin asi naki ngata. Makitibi kin, dɔmaji ə a ilə-n adi-de ki rəbi lə Tisiki əi ki Onəjim (4.7, 9). J-a j-ingə kəy kəm ta joo me ti:

Go ta kuwə ji-naa ti, ki oyo ki ra Luwə (1.1-14) me kəy kəm ta ti ki dɔsɔy, Pol tɔji Kirisi tə nje kisi dɔ nɛ je ti pəti. Əl təkɪ Kirisi aw ki tɔgɪ dɔ tɔgɪ je ki go ndil ti pəti, e ki karne ba ə e NGar dɔ njé kaw-naa je ti (1.15-2.3). Go ti ba, Pol ndəji Kolosi je dɔ nɛ ndo ti ki loe al ki dije madi isi njiyəi dande ti (2.4-25).

Me kəy kəm ta ti ki dɔbəy ti, Pol ole me Kolosi je dɔ ne ti ki e njiyə me kisi ki dɔ taa ki sigi, naa ti ki Kirisi, dan njé kun go Kirisi je ti wa nim, dan dije ti ki me kəy je ti ləje ə se dan dije ti ki me 6e ti ba pəti (3.1-4.6). Nje kaw kilə Pol təl ta ta ləne ki ta je ki dɔne ti wa, əl-n ta ndəy be dɔ Tisiki ti nim dɔ Onəjim ti nim, taa ta kuwə ji-naa ki e wa ndangi ki jine kin tɔ (4.7-18).

Nə ndo je ki go rəbi ti al, toi dangi dangi ki dɔkagiloe, dɔkagiloe, nə nə kare ki njé ndo nəe je kin pəti isi sangi, e ta kadi njé kun go Kirisi je sɔli me kadi mede Kirisi ti ki e ki karne ba par ə aw ki tɔgi kin. E mbata kin ə, makitibi ki Pol ndangi adi Kolosi je kin, re isi tidə 6a, a o kadi ta ki me ti sɔbi dɔ dɔkagilo ki je ti 6one wa kin tɔ. Makitibi kin a dɔ Kirisi ti, tɔje kadi aw ki tɔgi dɔ tɔgi je ki go ndil ti pəti, kadi taa-n dije ki isi gin tɔgide ti ilə-de taa.

Kuwə ji-naa

¹ Mi Pol ki nje kaw kilə lə Jəju Kirisi ki go ndigi ti lə Luwə, naa ti ki ngakoje Timote ə ji ndangi makitibi kin,

² j-adi səi dije lə Luwə ki isi me 6e ti ki Kolosi, səi ngakoje je ki adi mesi Kirisi. Kadi Luwə ki Bawje ra səsi maji ə kadi adi səsi lapiya tɔ.

Pol ra oyo Luwə mbata lə Kolosi je

³ Ji ra oyo Luwə ki Baw Babe ləje Jəju Kirisi, dɔkagilo je pəti ki j-isi j-əl sie ta ki mbata ləsi.

⁴ Ji ra-e oyo tado j-o poy kadi-me ləsi ki adi Jəju Kirisi, ki ndigi ki indigi dije pəti ki əi dije lə Luwə.

⁵ Kadi-me əi ki ndigi-naa kin, ginde e dɔ nə kində me dɔ ti ləsi ki Luwə isi ngəm me dɔrɔ ti adi səsi.

Igari ne kində me dɔ ti kin ki takul kilə mbe Poy Ta ki Maji ki e ta ki rɔjeti.

⁶ Poy Ta ki Maji kin aw bitɪ tee rɔsi ti. Ningə asi dɔnangi ba pəti ki kandine, ə aw ki kəte kəte təkɪ ton dansi ti kin be tɔ, ilə ngire me ndɔ ti wa ki oi poy ta ki ɔji dɔ me-maji lə Luwə, taa igari me-maji kin tə ne ki rɔjeti.

⁷ E Eparirasi, ki e madije ki ngay me kilə ti ə ndo səsi ne je kin. E dəw ki dana ki nje ra kilə bəə lə Kirisi dansi ti.

⁸ Ningə e ə əl-je ta dɔ ndigi-naa ti ki NDil Luwə adi səsi.

Kəl ta ki Luwə mbata ti lə Kolosi je

⁹ Be ə, je ka, ndɔ ti wa ki j-o-n poy ta ləsi kin, j-iyə ta kəl ta ki Luwə ki mbata ləsi al. Ji dəje kadi adi səsi igari ndigi lie maji ki takul gosi ki ne gər ki NDile adi səsi.

¹⁰ Lo kin ti, pa njiyəsi a e pa njiyə dije lə Babe ki nəl-e me ne je ti pəti, a e pa njiyə ki aw ki kəte kəte me kilə ra ki maji ti, ə a itɔgi me gər Luwə ti par par tɔ.

¹¹ Ji dəji Luwə kadi adi səsi tɔgi me ne je ti pəti ki takul tɔge ki əti bəl, mba kadi uwəi tɔgisi ba me ne je ti pəti, ki kisi dɔ ti ki kore me tɔ.

¹² İrai oyo Luwə ki Bawje ki rənəl təkɪ adi səsi asi kingə ne nduwə ki isi ngəm me bəkɔ ti lie ki ndole, mbata dije ki əi yəe je.

¹³ E ə, ɔr-je gin tɔgi ti lə til, re səje me bəkɔ ti lə NGone ki nje ndigi lie.

¹⁴ Ki takul NGone kin ə, je-n ki taa kiyə taa, ningə majal je ləje e ki kiyə go kɔ tɔ.

¹⁵ NGon kin, e bana kəm Luwə ki dəw asi ko-e al. E NGon dər ne kində je pəti.

¹⁶ Təki rəjetı, e ki takule ə Luwə ra-n ne je pəti ki me dərə ti nım, ki dənangi ti ne nım tə. Ne je ki dəw oo-de ki kəmne, ki ne je ki dəw oo-de ki kəmne al, re ən kəbe je, ki təgi je, ə se njé kəbe je ba pəti ka, e ki takule ə Luwə ra-n ne je kın pəti nım, ta e ki mbata lie nım tə.

¹⁷ Kırısı e nō ne kində je ti pəti. Nıngə e ki takule ə, ne je pəti ki Luwə rade, ai ki dəde taa tə.

¹⁸ Kırısı ə wa e ki bo də njé kaw-naa je ti, ki əi darə. E wa ə e kilə ngırə ne, e dəw ki də kəte ki tēē dan njé koy je ti. Be mba kadi-me ne je ti pəti, e ki də kəte.

¹⁹ Tadə Luwə ge kadi ne je pəti ki rəne ti asi-naa bərərə rə Kırısı ti.

²⁰ Nıngə e ki takul Kırısı ə Luwə ndıgi kadi dije pəti ki dənangi ti ne iləi noji naa ti səne. E ki takul məsi NGone ki ay də kagi-dəsi ti kın ə, Luwə adi lapıya re-n dənangi ti ne ə se dərə ti.

²¹ Nıngə səi je ki kəte ərı kagısı kə ta kəm Luwə ti, səi njé bə je lie ki mbata mər ta je ləsi, ki ne rasi je ki majal.

²² Nə ngəsine Luwə ilə noji naa ti səsi ki takul darə Kırısı ki go rəbi koye, mba kadi ra adi tēēi ta kəm Bəbe ti tə dije ki ayi njay nım, ki kanji yoro nım, taa ki kanji ta madi dəsi ti nım tə.

²³ Nıngə, maji kadi ai də njasi ti me kadi-me ti. Kadi-me kın ə e gın kəy ki ngə ki ai də ti, ki kanji kadi ne madi ər səsi aw səsi say ki ne kində me də ti ləsi ki Poy Ta ki Maji adi səsi kın. Poy Ta ki Maji ki e ki kilə mbə kadi dije pəti ki dənangi ti ne kın. Nıngə e ə mi Pol mi nje ra kile.

Kə lə Pol mba njé kaw-naa je

24 NGosine, rɔm nəl-m mbata kɔ je ki m-isi m-ingə mbata ləsi. Təki rɔjeti, me rɔm ti, ki mbata maji lə njé kaw-naa je ki əi darɔ Kirisi, m-təl ta kɔ je ki nay kadi Kirisi ingə.

25 Ki mbata njé kaw-naa je ə m-təl-n nje ra kilə bəə ləde. E Luwə ə ilə kilə kin jim ti mba kadi m-ran səsi. Kilə kin e kadi m-ilə mbə Poy Ta ki Maji lə Luwə kin ba pəti madi səsi.

26 E ne ki to lo bɔyɔ ti ki rɔ gin dije ti pəti ki dɔkagilo je pəti, nə ngosine tɛɛ ki dɔe adi dije ləne gəri.

27 Tado Luwə ndigi kadi gəri ne ki ɔji kadi ra ə e ne ki maji ki əti bəl kin. E ne ki kində dɔe dana mbata maji lə dije pəti. Ne ki to lo bɔyɔ ti ki Luwə tɛɛ ki dɔe e Kirisi ki isi mesi ti, ə adi igəri ay njay təki a səi me tɔba ti lə Luwə kin.

28 E Kirisi kin ə, j-isi j-ilə mbə Poy Ta ki Maji lie ki rəbi ndər mbi dije pəti, ki rəbi ndo-de ne ki takul kəm-kədi ki Luwə adi-je. MBA kadi əi pəti təli dije ki tɔgi gangi me Kirisi ti.

29 MBata kin ə, m-isi m-ra-n kilə nim, m-isi rɔ-n nim, ki tɔgi Kirisi ki isi ɔdi rone rɔm ti.

2

1 Təki rɔjeti m-ndigi ngay kadi igəri rɔ ki ngə ngay ki m-isi m-rɔ mbata ti ləsi, ki mbata lə Lawodise je, taa ki mbata ti lə ndəge je pəti ki ooi mi ki kəmde al kin tɔ☆.

2 Rɔ kin, m-rɔ kadi m-ilə-n dingəm mede ti, ə kadi indəi rɔde naa ti kare ba me ndigi-naa ti, taa kadi ingəi ne gər ki a adi-de me ki tɔ kati, kadi gəri ne lə Luwə ki to lo bɔyɔ ti, ki e Kirisi kin nim tɔ.

3 E rɔ Kirisi ti kin ə dəw a ingə gosi je ki ne gər je ti.

☆ 2:1 4.13

⁴ M-əl ta kɪn be mba kadi dəw madi ədi səsi ki ɓal ta ki tane ti al.

⁵ E ki rɔjeti, kadi darɔm e say səsi, nə ndilm e naa ti səsi. Ningə rɔm nəl-m ngay kadi m-o səsi, ai dɔ njasi ti, taa uwəi tɔgisi nga me kadi-me Kirisi ti tɔ.

Nɛ je pəti e rɔ Kirisi ti

⁶ NGa ningə, təkɪ itaai Jəju Kirisi, ki Baɓe mesi ti, maji kadi injiyəi sie naa ti.

⁷ Həi ngirəsi rɔe ti, ə adi kisi ki dɔ taa ləsi e kəy ki indəi dɔe ti tɔ. Ningə kadi ai dɔ njasi ti me kadi-me ti ki go nɛ ndo ti ki ingəi, ə kadi irai oyo Luwə ki dɔ-naa ti dɔ-naa ti tɔ.

⁸ Indəi kəm-kədi dɔ rəsi ti, kadi dəw madi ədi səsi ki nɛ gər ki ngom, ki ndae goto ki e nɛ gər lə dije ki dɔnangi ti ne kɪn al. E nɛ gər ki ngire e dɔ nɛ jibəl ɓe ti lə dije ki dɔ tɔgi ndil je ti ki majal ki dɔnangi ti ne, ɓi e dɔ Kirisi ti al✧.

⁹ Tado nɛ je pəti ki rɔ Luwə ti, tade asi-naa bərərə rɔ Kirisi ti.

¹⁰ NGa ningə səi ingəi nɛ je pəti asi-naa rɔ Kirisi ti, nɛ ki du səsi goto. Kirisi ki e ki bo dɔ tɔgi je ti, ki dɔ njé kɔɓe je ti pəti.

¹¹ E me kɪndə rɔ naa ti ki Kirisi kɪn ə itəli dije ki njé kijə mətide. Ningə e kijə mətɪ ki dəw ɓa ijə ki jine al, nə e kijə mətɪ ki Kirisi wa ə ijə, mba kadi ɔr-n ngur darɔ ki isi aw səsi ki majal ti kɪn kɔ.

¹² Ki rəbi lə batəm ki irai, dibi səsi naa ti ki Kirisi, ningə uni səsi naa ti sie lo koy ti tɔ tado adi mesi dɔ tɔgi ti lə Luwə ki tɛɛ sie dan njé koy je ti.

¹³ Səi ki kəte, səi dije ki koy mbata majal je ləsi, səi dije ki səi *Jipi je al, ijəi mətisi al tɔ, nə ɓasine, Luwə

✧ 2:8 Gal 4.3

təl adi isi kəm ba naa ti Kirisi. Luwə iyə go majal je ləje pəti kə.

¹⁴ Luwə buji ne raje je ki to me makitibi, ki isi səki dəje, taa əsi-je ta ki go rəbi lə ndu-kun je kin kə; Luwə tuji-de kə ki go rəbi bə-de də kagi-dəsi ti.

¹⁵ E be ə, Luwə ər-n təgi ndil je ki majal ki təgi ki isi qi be kə[☆], ilə rəsəl dəde ti ta kəm dije ti, adi me njiyə tətə rə ti lə NGone, ki e Kirisi, əi je njiyəi tə dangay je.

¹⁶ Lo kin ti, adi dəw madi gangi ta dəsi ti mbata ne kuso ə se ne kay al, taa əji də ndə kə nay ə se ndə taa kəə lə Jipi je al.

¹⁷ Ne je kin pəti əi ndil ne je ki a rəi, nə ne ki rəjeti, e darə Kirisi.

¹⁸ Oti kadi adi dəw madi təl rə ki tətə ləsi kin yane ti. Adi e dije ki njé ra rəde njé də səl ti, isi əsi dəde nangi nə malayka je ti, əi dije ki njé koo ne ki koo me ni ti tə ne ki ngay. Əi dije ki tagade e taga ki a də dəw ti wa par, adi isi indəi gude.

¹⁹ Dijee kin, mbati kuwə ki Kirisi ki e ə e də kin. Nə təkə rəjeti, e ki takul Kirisi ki e də kin ə ngan rə je pəti ingəi ne ki kadi a ra səde. E ki takule ə tal je ki singə je isii ta naa ti isi rai kilə. Ningə e Luwə ə e nje ra kadi darə kin təgi.

²⁰ Səi ki koy naa ti ki Kirisi, adi səi ki taa kiyə taa ji təgi ndil je ti ki majal ki me duniya ti. NGa ra ban ə, to təkə ji kisisi ki dəsi taa, isi gin təgi ti lə ne je kin bəy be ə? MBa ri ə itəli rəsi gin ndu je ti ki ə nə:

²¹ «Un ne kin al! Ɔdi ne kin tai ti al! adi ji ədi ne kin al!»

²² Ne je kin pəti əi ne je ki a tuji kə go kilə ti ki dəw ra-n. Ningə əi ndu-kun je ki ne ndo je ki go ne gər ti lə dije.

☆ 2:15 1.16

²³ Təki rəjeti, kun-ndu je kin, təki o ɓa, e ne ki taji gosi, mbata taji rəbi ra Luwə lə dəw ki ra, rəbi səl dɔ ki rəbi kində tɔgi dɔ darɔ rɔ ti, nə ke ə e ndu-kun je ki ndade goto, toi mbata təl ngur darɔ par.

3

Kisi ki dɔ taa ki sigi ki Kirisi

¹ Təki uni səsi lo koy ti naa ti ki Kirisi, maji kadi isangi ne je ki taa dɔrɔ ti, ki e lo ki Kirisi isi ti, dɔ ji kɔ Luwə ti kin[☆].

² Iməri ta dɔ ne je ti ki dɔrɔ ti, ɓi dɔ ne je ti ki dɔnangi ti ne al.

³ Tado səi dije ki oyi, ningə kaji ləsi e ki ɓɔyɔ naa ti ki Kirisi rɔ Luwə ti.

⁴ Dɔkagilo ki Kirisi ki e kisi ki dɔ taa ləsi a tɛɛ ningə, səi je ka a tɛɛi sie me tɔɓa ti ki taa lo.

Kisi ki dɔ taa ki kate ki e ki ɓone

⁵ Maji kadi idibi ne je pəti ki dɔnangi ti ne, ki to rɔsi ti: adi ə sangi-naa ki lo kaya ti, ki ne ra ki to nje, ki ngur darɔ ki əti ɓəl, ki ɓo ne je ki majal, ki ra ta ne kingə, ki e yo ki ra.

⁶ E ne je kin ə isi re ki wongi lə Luwə dɔ dije ti ki njé tɔ-e rɔ.

⁷ E kin ə, e pa njiyəsi je ki kate, loki isi me majal ti ɓəy.

⁸ Nə ngəsine, maji kadi imbati ne je kin pəti, adi e wongi ki ra, ki ne ra ki dɔ gu ti, ki me ndul, ki ne taji, ki ta je ki go rəbe ti al ki isi tɛɛ tasi ti.

⁹ Oti kadi əli-naa ta ngom. Tado səi dije ki ɔri kəki dəw rɔsi ti kɔ, ki kilə rae je ngata.

☆ 3:1 Pa je 110.1

10 Ningə ngosine iləi dəw ki sigi rəsi ti, dəw ki Luwə ki nje kində ne je isi təl-e ki sigi ti taa taa, kadi titi-naa sie, kadi teğ gər-e ti ki rəjeti.

11 Me kisi ki də ta ti ki sigi kin, kər kəm-naa goto, mbo dije ti ki əi *Jipi je ə se njé je ki əi Jipi je al, mbo njé kijə mətide ki njé kijə mətide al. Kəl kə nə mba ə se dəw ki kəm teğ al, goto, kəl kə nə bəə ə se dəw dərəne, goto. E Kirisi par ə e ne je pəti me ne je ti pəti.

12 Səi dije ki Luwə mbəti səsi, səi dije lie ki ndigi səsi. E mbata kin ə, maji kadi awi ki koo kəm-to-ndoo lənaa rəsi ti, kadi səi njé ra maji, njé kilə də nangi, kadi səi dije ki səl ləm ləm, dije ki njé kore me.

13 Maji kadi isi də ti ki naa. A re dəw madi aw ki ta ki to rəe də ngokəe ti ə, maji kadi iyəi go kə yo ki ne adi-naa, təkiri Kirisi iyə-n go majal je ləsi kə kin be tə.

14 Ne ki e də ne je ti pəti, e kadi ndigi-naa e kibi rəsi. E ə a ra kadi kində rə naa ti ləsi a e ki rəjeti.

15 Kadi lapiya lə Kirisi o be ngəmesi ti. E ki mbata lapiya kin ə Luwə bar-n səsi, kadi itəli darə ki kare. Ningə kadi səi njé ra oyo Luwə.

16 Maji kadi ta lə Kirisi rosi mesi. Ningə kadi indoi-naa ne je, indəji-naa je ki yo ki ne ki gosi ki ngay. NGa ningə, kadi osi pa, iləi təji də Luwə ti ki oyo ki ra me Pa je ti ki me makitibi ti lə Luwə, ki me pa kilə dīgəm me naa ti, ki me pa je ti ki NDil Luwə adi səsi.

17 Ne je pəti ki isi irai, ki ta je pəti ki isi əli, maji kadi e me tə Bəbe Jəju ti, nga ningə kadi irai oyo Luwə ki takule.

Kisi njé kadi-me je me kəy ti

18 Səi dəne je ki njé ngaw, maji kadi ilai dəsi gin tɔgi ti lə ngawsi je təkɪ sɔbi kadi irai ta kəm Bəbe ti.

19 Səi ngaw dəne je, maji kadi indigi nesi je. Adi rɔsi atɪ səsi dɔde ti al.

20 Səi ngan je, maji kadi itəli rɔsi go ta ti lə njé kojisi je me ne je ti pəti, tadɔ e ne ki nəl Bəbe.

21 Nɪngə səi baw ngan je, oti kadi irai adi wongɪ ra ngansi je, tadɔ re e be ə, mede a tuji.

22 Səi bəə je, maji kadi itəli rɔsi go ta ti lə basi je ki dɔnangi ti ne kin. Nɪngə, oti kadi irai tə kilə kadi kəm-naa taga ne par kadi nəl dəw, nə kadi irai ki me ki kare, ki bəl NDil Bəbe.

23 Kilə ki to ban ki isi irai ba, kadi irai ki me ki maji tə kilə lə Bəbe ə isi irai, bi tə kilə lə dəw, al.

24 Nɪngə kadi igəri təkɪ Bəbe a adi səsi ne maji ki ngəm mbata lə dije ləne kin, tə ne kigə go jisi. Tadɔ Bəbe ki rɔjeti e Jəju Kirisi.

25 Ki rɔjeti, dəw ki ra ne ki go rəbe ti al, a tətɪ kandi ne ra ki go ti al ləne kin, tadɔ kər dəw dana goto rɔ Luwə ti.

4

1 Səi ki awi ki bəə je, maji kadi irai-de maji, ki go rəbi ki dana. Nɪngə kadi səi ka igəri təkɪ, awi ki Basi dɔrɔ ti nɔq to.

Ta kəji ki dɔ kaw kilə ti

2 Maji kadi uwəi tɔgisi ba me kəl ta ti ki Luwə, kadi kəl ta ki Luwə ra adi isi dɔgi ti, irai oyo Luwə ki dɔ-naa ti dɔ-naa ti.

3 NGa nɪngə, əli ta ki Luwə ki mbata ləje tɔ, kadi Luwə tɛɛ ta rəbi noje ti kadi j-əl ta lie, kadi j-ilə-n mbe ne ki to lo bɔyɔ ti ɔji dɔ Kirisi, ki m-to-n dangay ti kin.

⁴ Əli ta ki Luwə kadi m-əl ta lə Kirişi kin ay njay, tək i səbi kadi m-əl-n.

⁵ Maji kadi kəmsi ədi də pa njiyəsi ti ki rə dije ti ki adi mede Kirişi, al. Nینگə kadi dəkagilo ki Luwə adi səsi kin, irai kilə, 6i adi man kə kare al.

⁶ Maji kadi ta kəlsi e ta kəl ki maji ki dəkagilo je pəti, ki kadi dəw ینگə ne ki to sie soti me ti. Kadi igəri lo kuji tur ta dije ti ki adi mede Kirişi, al.

⁷ NGokom ki nje ndigi ləm, Tisiki a əl səsi ta je pəti ki dəm ti adi oi. Tisiki[☆] e nje kilə bəə ki a də njane ti, taa e madi-kiləm me kilə ti lə Bəbe nim tə.

⁸ NGA ینگə, m-ilə sie be mba kadi adi səsi poyje adi oi nim, taa ki mba kadi ilə dینگəm mesi ti nim tə.

⁹ Onəjim[☆] ki e ngokoje ki dana, ki ji ndige ngay kin, a uwə sie rəbi. Onəjim e dəw rəsi. Əi ki Tisiki a əli səsi ne je pəti ki isi rai ne rəje ti ne adi oi.

Kuwə ji-naa ki dəbəy ti

¹⁰ Madi dangay ləm Arisitarki[☆] uwə jisi, taa Marki[☆] ki ngonan Barnabasi[☆], ki ینگəi ta kəji je ki oji dəe kin ka uwə jisi tə. Re aw tē rəsi ti 6a, kadi uwəi-e ki rəsi ti maji.

¹¹ Jəju, ki isi bari-e Jusitusi uwə jisi tə. MBQ *Jipi je ti ki adi mede Kirişi kin, əi je kin par ə isi rai səm kilə ki oji kəbe lə Luwə ne. Əi je kin ə əi təgim ki ngay.

¹² Epapirasi[☆] ki e dəw ləsi uwə jisi tə. Epapirasi e bəə kilə lə Jəju Kirişi, ki iyə ta rə al ki mbata ləsi, me kəl ta ti ki Luwə. Əl ta ki Luwə mba kadi ai də njasi ti, kadi səi dije ki təgi gangi me NDil ti, taa kadi səi bəsi kadi irai ndigi ra je lə Luwə pəti tə.

☆ **4:7** Knjk 20.4; Ep 6.21-22 ☆ **4:9** Plm 10-15 ☆ **4:10** Knjk 19.29; 27.2 ☆ **4:10** Knjk 12.12, 25; 13.13; 15.37-39 ☆ **4:10** Knjk 9.27; 11.22, 30 ☆ **4:12** 1.7

13 M-ma naji læ Epaṗirasi tæki adi rone ko ngay mbata ti læsi, ki mbata læ njé kaw-naa je ki Lawodise ti nim, taa njé ki Iyerapolisi ti nim tɔ.

14 Madije ki ngay, Luki, ki e dokitur æi ki Dəmasi uwæi jisi tɔ☆.

15 Uwæi ji ngakoje je ki Lawodise ti, naa ti ki Nimpa æi ki njé kaw-naa je me kəy ti lie adi-je tɔ.

16 Loki itidæi makitibi kin ningə, ilæi adi njé kaw-naa je ki Lawodise ti ka tidæi tɔ. NGa ningə e ki njé ki Lawodise ti a ilæi adi səsi kin, səi ka itidæi tɔ.

17 Ningə kadi æli Arsipi☆ adi ində kəmne go kilæ ti læ Babe ki ingə kin, kadi ra kile maji.

18 Ta kuwə ji kin e mi Pol ə wa ə m-ndangi. Kadi mesi oy dəm ti al, tæki m-to dangay ti ne. Kadi me-maji læ Luwə e naa ti səsi. Amen!

☆ 4:14 2Tim 4.10, 11; Plm 24 ☆ 4:17 Plm 2

KĒLƏ-MĪNDĪ KĪ SĪGĪ

New Testament in Bedjond (CD:bjv:Bedjond)

copyright © 2011 Wycliffe Bible Translators, Inc.

Language: Bedjond

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Bedjond

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2021-11-01

PDF generated using Haiola and XeLaTeX on 25 Aug 2024 from source files
dated 29 Jan 2022
a4f34a03-c89e-55e0-bc3f-22f7829df823